

四庫全書

集部

欽定四庫全書

花菴詞選續集卷五

宋 黃昇 撰

宋詞

劉德修

名光祖號後溪蜀之名士有鶴林文集小詞

附焉

鵲橋仙

雷別

相逢一笑又成相避南鴈歸時霜透明朝人在短亭西

看舞袖雙雙行酒 歌聲此處秋聲何處幾度亂愁搔
首如何不寄一行書有萬緒千端別後

昭君怨

別恨

人在醉鄉居住記得舊曾來去疎雨聽芭蕉夢魂遙
惆悵柳烟何處目送落霞江浦明夜月當樓照人愁

江城子

梅花

十分雪意却成霜算雲黃月微茫只有梅花依舊吐幽
芳還喜無邊春信漏疎影下覓浮香 才清端是紫薇

卽別鵷行憶宮牆夜半胡為人與月交相君合召歸吾
老矣月隨去照西廂

洞仙歌

荷花

晚風收暑小池塘荷淨獨倚胡床酒初醒起徘徊時有
香氣吹來雲藻亂葉底游魚動影空擎承露蓋不見
水容惆悵明粧曉鸞鏡後夜月涼時月淡花低幽夢覺
欲憑誰省且應記臨流凭闌干便遙想江南紅酣千頃

長相思

別意

玉樽涼玉人涼若聽離歌須斷腸休教成鬢霜 畫橋
西畫橋東有淚分明清漲同如何畱醉翁

水調歌頭

旅思

客夢一回醒三度碧梧秋仰看今夕天上河漢又西流
早晚涼風過鴈驚落空堦一葉急雨鬧清溝歸計休令
算宵露浥征裘 古來今生老病許多愁那堪更說無
限功業鏡中羞只有青山高致對此還論世事舉白與
君浮送我一盃酒誰起舞涼州

臨江仙

春思

小院回廊春寂寂
晚來獨自閒行
畫簾東畔碧雲生也
知無雨空滴枕邊聲
一簇小桃開又落
低頭拾取紅英
東風相送忘相迎
梨花寒食到得錦官城

又
自詠

我似萬山千里外
悠然一片歸雲
官衙猶自帶云云
誰知於進士已是故將軍
閒坐閒行閒飲酒
閒拈閒字閒文
諸公畱我笑紛紛
一枝簪寶髻六幅舞羅裙

踏莎行

春暮

掃徑花零閉門春晚恨長無奈東風短起來消息採茶
蘼雪條玉藥都開徧晚月魂清夕陽香遠故山別後
誰拘管多情於此更情多一枝嗅罷還重撚

醉落魄

春日懷故山

春風開者一時還共春風謝柳條送我今槐夏不飲香
醪辜負人生也曲塘泉細幽琴寫胡床滑簟應無價
日遲睡起簾鉤挂何不歸歟花竹秀而野

李子大

名洪家世同登桂籍躋臚仕號淮甸儒族子
大其弟漳泳淦淞皆以文鳴有李氏花萼詞
五卷其姪直倫為之序廬陵人

念奴嬌

曉起觀落梅

麗譙吹角漸疎星明澹簾篩殘月嫋嫋霜飈欺翠袖飛
下一庭香雪半面粉粧新迴風舞困此况真奇絕枕柳林
裏蘇仙偏感華髮休怨時暫飄零玉堂清夢不惹閒

蜂蝶好似王家叢竹畔乘興山陰時節剪水無情閨風
歸去忍使芳心歇和羹有待恁時身到天闕

李子清

名漳

鵲橋仙

七夕

迢迢郎意盈盈妾恨今夕鵲橋欲度世間兒女一何癡
鬪乞巧紛紛無數遙知此際有人孤坐心切天街雲
路好因緣是惡因緣夢魂遠陽臺雨暮

桃源憶故人

閨情

小樓簾捲闌干外
花下朱門半啟中
有傾城佳麗一笑
西風裏
盈盈臨水情難致
盡日相看如醉
乾鵲不知人意
只管聲聲喜

李子永

名泳

賀新郎

感舊

門掩長安道
捲重簾垂楊散暑
嫩涼生
早午夢驚回
庭

陰翠蝶舞鶯吟未了政露冷芙蓉池沼金鴈塵昏么絃
斷理餘音尚想腰支裏歡漸遠思還繞臨臯望極滄
江渺晚潮平湘烟萬頃斷虹殘照綵舫凌波分飛後別
浦菱花自老問錦鯉何時重到樓迥層城看不見對瀟
瀟暮雨憐芳草幽恨濶楚天杳

李子召

名詮

滿庭芳

送張守漢卿赴召

麥秀連雲桑枝重綠史君佳政流傳鳳銜丹詔來自九重
天千里歡騰祖帳棠陰外多少攀轅津亭路紆如五鼓
難駐鄧侯船光華家世事門中列戟圯上遺編况建炎
勲業圖畫凌烟此去朝端濟美看平步兩兩台躔須知
道中興盛治主聖賴臣賢

李子秀

名浙

踏莎行

送新城交代李達善

紅藥香殘綠筠粉嫩春歸何處尋春信綉鞍初上馬蹄
輕舉頭便覺長安近別酒無情啼粧有恨山城向晚
斜陽褪清江極目帶寒烟錦鱗去後憑誰問

劉改之

名過太和人稼軒之客王簡卿侍郎嘗贈以
詩云觀渠論到前賢處據我看來近世無其
詞多壯語蓋學稼軒者也號龍洲道人

賀新郎

懷舊

老去相如倦。問文君說似，而今怎生消遣。衣袂京塵曾
染處，空有香紅尚軟。料彼此魂銷腸斷，一枕新涼眠客
舍。聽梧桐、疎雨秋聲，顫燈暈冷，記初見。樓低不放珠
簾捲。晚粧殘翠鈿狼藉，淚痕凝臉。人道愁來須殢酒，無
奈愁深酒淺。但寄興、焦琴紉扇。莫鼓琵琶江上曲，怕荻
花楓葉俱淒怨。雲萬疊，寸心遠。

又 遊西湖

睡覺啼鶯曉。醉西湖、兩峰日日買花簪帽去。盡酒徒無

人問惟有玉山自倒任拍手兒童爭笑一騎乘風翩然
去避魚龍不見波聲悄歌韻遠喚蘇小神仙路近蓬
萊島紫雲深參差禁樹有烟花遶人世紅塵西障日百
計不如歸好付樂事與它年少費盡柳金梨雪句問沉
香亭北何時召心未愜鬢先老

又 贈張彥功

曉印霜花步夢半醒扶上彫鞍馬嘶人去嵐溼青絲雙
轡冷緩鞚野梅江路聽畫角吹殘更鼓悲壯寒聲撩客

恨甚貂裘重擁愁無數霜月白照離緒 青樓回首家
何處早山遙水闊天低斷腸烟樹誰念天涯牢落况輕
負暖雲濃雨記酒醒香銷時語客裏歸鞚須早發怕天
寒風急相思苦應為我翠眉聚

又

多病劉郎瘦最傷心天寒歲晚客它鄉久大舸翩翩何
許至元是高陽舊友便一笑相歡攜手為問武昌城下
月定何如揚子江頭柳追往事兩眉皺 燭花細剪明

於畫喚青娥小紅樓上殷勤勸酒昵昵琵琶恩怨語春
筓輕攏翠袖看舞徹金釵微溜若見故鄉吾父老道長
安市上狂如舊重會面幾時又

念奴嬌

自述

知音者少算乾坤許大着身何處直待功成方肯退何
日可尋歸路多景樓前垂虹亭下一枕眠秋雨虛名相
誤十年枉費辛苦不是奏賦明光獻書北闕無驚人
之語我自匆忙天未許贏得衣裾塵土白壁堆前黃金

買笑付與君為主尊鱸江上浩然明日歸去

糖多令

再過武昌

蘆葉滿汀洲寒沙帶淺流二十年重度南樓柳下繫船
猶未穩能幾日又中秋黃鶴斷磯頭故人曾到不舊
江山都是新愁欲買桂花重載酒終不似少年遊

水調歌頭

春半

春事能幾許密葉著青梅日高花困海棠風暖想都開
不惜春衣典盡只怕春光歸去片片點蒼苔能得幾時

好追賞莫徘徊 雨飄紅風換翠苦相催人生行樂且
須痛飲莫辭杯坐則高談風月醉則恣眠芳草醒後亦
佳哉湖上新亭好何事不曾來

又 自述

弓劍出榆塞鈐槩上蓬山得之渾不費力失亦匹如閑
未必古人皆是未必今人俱錯世事沐猴冠老子不分
別內外與中間 酒須飲詩可作拍休彈人生行樂何
自催得鬚毛斑達則牙旗金甲窮則蹇驢破帽莫作兩

般看世事只如此自有識鴉鷺

天仙子

初赴省別妾

別酒醺醺渾易醉回過頭來三十里馬兒不住去如飛
牽一憩坐一憩斷送殺人山共水是則青衫終可喜
不道恩情拚得未雪迷村店酒旗斜去則是住則是煩
惱自家煩惱你

沁園春

風雪中欲詣稼軒久寓湖上未能一往
因賦此詞以自解

斗酒羶肩風雨渡江豈不快哉被香山居士與林和靖

約坡仙等勒駕予回坡謂西湖正如西子淡粧濃抹臨
照臺二公者皆掉頭不顧只慙傳杯 白云天竺去來
看金壁崔嵬樓觀開沉一澗縈迂東西水遶兩山南北
高下雲堆逋曰不然暗香浮動何似孤山先放梅晴須
去訪稼軒未晚且此徘徊

劉叔擬

名仙倫廬陵人自號招山有詩集行於世樂
章尤為人所膾炙吉州刊本多遺落今以家

藏善本選集

賀新郎

壽王侍郎簡卿

小隊停鉦鼓向沙邊柳下維舟慶公初度平盡羣蠻方
易鎮此事多應有數奈自古功成人妬君看樂羊中山
役任謫書盈篋終無據千載下竟誰與詩中帶得西
山雨指天台鴈蕩歸歟壽鄉深處緩急朝廷須公出更
作中流砥柱笑癡騃紛紛兒女多少人間不平事有皇
天老眼能區處揮玉笋聽金縷

又題吳江

重喚松江渡嘆垂虹亭下銷磨幾番今古依稀四橋風景在為問坡仙甚處但遺愛沙邊鷗鷺天水相連蒼茫外更碧雲去盡山無數潮正落日還暮十年到此長凝竚恨無人與共秋風鱸絲尊縷小轉朱絃彈九奏擬致湘妃伴侶俄皓月飛來烟渚恍若乘槎河漢上怕客星犯斗蛟龍怒歌欸乃過江去

又洪守席上詠牡丹

翠蓋籠嬌面記當年沉香亭北醉中曾見見了風流傾
國艷紅紫紛紛過眼算好處何嫌春晚誰把天香和曉
露倩東風特地勻芳臉千萬朵一時徧隔花聽取提
壺勸道此花過了春歸蝶愁鶯怨挽住東君須醉倒花
底不妨畱戀待喚取笙歌一片最愛就中紅一朵似狀
元得意春風殿還惹起少年眼

又 贈建康鄭玉脫籍

鄭玉非娼女嘆塵緣未了飄零被春畱住腸斷胭脂坡

下路成甚心意緒生怕入梨園歌舞寂寞陽臺雲雨
散算人間誰是吹簫侶空買斷兩眉聚 新來鏡裏驚
如許暗傷懷鶯老花殘幾番春算事逐孤鴻都已往月
落千山杜宇念修竹天寒何處不念瑣窗并綉戶妾從
前命薄甘荊布誰為作解條主

念奴嬌

送張明之赴京西幕

餘艤東下望西江千里蒼茫烟水試問襄州何處是雉
堞連雲天際叔子殘碑卧龍陳迹遺恨斜陽裏後來人

物如君瓌偉能幾 其肯為我來邪河陽下士正自強
人意勿謂時平無事也便以言兵為諱眼底山河樓頭
鼓角都是英雄淚功名機會要須閒暇先備

又 感懷呈洪守

吳山青處悵長安路斷黃塵如霧荆楚西來行壑遠北
過淮堧嚴扈九塞貔貅三關虎豹空作陪京固天高難
叫若為得訴忠語 追念江左英雄中興事業枉被姦
臣誤不見翠華移蹕處枉負吾皇神武擊楫憑誰問籌

無計何日寬憂顧倚筇長嘆滿懷清淚如雨

又

長沙趙帥席上作

西風何事爲行人掃蕩煩襟如洗熏漲蒸瀾都卷盡一
片瀟湘清泚酒病驚秋詩愁入鬢對景人千里楚宮故
事一時分付流水江上買取扁舟排雲湧浪直過金
沙尾歸去江南丘壑處不用來尋月姊風露盃深芙蓉
裳冷笑傲烟霞裏草廬如舊卧龍知爲誰起

滿江紅

題快閣和徐宰韻

快閣東西鷗邊問晚晴可喜鷗解語旣盟之後兩翁曾
倚笛弄慣聽黃魯直履聲深識徐淵子添我來相對兩
忘機真相似也不種閒桃李也不翫佳山水有新詩
字字愛民而已一片心間秋月外三年人在春風裏漲
一篙江水送歸鴻明朝是

又
春曉

着意畱春畱不住春歸難戀甯苦是梅天煙雨麥秋庭
院嫩竹濃陰鶯出谷柔柔采盡蠶成繭奈沈腰寬盡有

誰知難消遣 幽閣恨雙眉 歛香牋寄飛鴻 遠向風簾
羞見一雙歸燕 翠被閒將 情做夢 青樓賺得 恩成怨對
尊前莫惜喚瓊姬 持杯勸

木蘭花慢

秋日海棠

漸秋空向晚 被風雨 趲重陽 正木落疎林 海棠枝上 忽
見紅粧料應妬它 蘭菊甚 年年獨自占秋光 故把春風
嬌面向人 逞艷呈芳 看來畢竟此花強 祇是欠些香
俏 一似當年五陵公子 却厭膏粱 肯來水邊竹下 與幽

人相對說淒涼只恐夜深花睡五更微有清霜

霜天曉角

題蛾眉亭

倚空絕壁直下江千尺天際兩蛾凝黛愁與恨幾時極
暮潮風正急酒醒聞塞笛試問謫仙何處青山外遠
烟碧

訴衷情

客中

征衣薄薄不禁風長日雨絲中又是一年春事花信到
梧桐雲漠漠水溶溶去匆匆客懷今夜家在江西身

在江東

江神子

洪守出歌姬就席口占

華堂深處出娉婷
語聲輕笑聲清燕語鶯啼一一付春
情恰似洛陽花正發見花好不知名
金甌盛酒玉纖擎
滿盈盈勸深深不怕主人教
你十分斟只怕酒闌歌罷後人不見暮山青

繫裙腰

愁別

山兒轟轟水兒清
船兒似葉兒輕風兒更没人情月兒

明廝合造送行人 眼兒簌簌淚兒傾 燈兒更冷青青
遭逢着鴈兒又沒前程 一聲聲怎生得夢兒成
詞稼薄而意優

系

永遇樂

春算有懷

青幄蔽林白氍鋪徑紅雨迷楚畫閣關愁風簾捲恨盡
日縈情緒陽臺雲去文園人病寂寞翠尊彫俎惜韶容
匆匆易失芳叢對眼如霧 巾欹潤衰衣寬涼溲又覺
漸回驕暑解籜吹香遺丸薦脆小芰浮鴛浦畫欄如舊

依稀猶記佇立一鉤蓮步黯銷魂那堪又聽杜鵑更苦

菩薩蠻

怨別

吹簫人去行雲杳香篝翠被都閒了疊損縷金衣是他
渾不知冷烟寒食夜淡月梨花下猶自軟心腸為他
燒夜香

又

怨別

東風去了秦樓畔一川烟草無人管芳樹雨初晴黃鸝
三兩聲海棠花已謝春事無多也只有牡丹時知它

歸不歸

辭鄙
意濃

嚴次山

名仁樵溪人詞集名清江欸乃杜月渚為之

序其詞極能道閨闈之趣

賀新郎

寄上官偉長序云扁舟何時下滄灣孤
劍尚客東楚渺渺千里寄一曲歌觀物

懷人想見臨
風激烈也

蘭芷湘東國正愁予一江紅葉水程孤驛欲寫瀟湘無限意那得如椽彩筆但滿眼西風蕭瑟我所思兮何處

所在鍾津津上滄灣側誰氏子閨風客 閨風仙客才
無敵賦悲秋抑揚頓挫流離沉鬱百賦千詩朝復暮解
道波濤春力憶共爾乘槎吹笛八表神遊吾夢見渺洞
庭青草烟波隔空悵望楚天碧

又 清浪軒送春

碧浪搖春渚浸虛簷蒲萄澆漾翠綃掀舞委曲經過臺
下路載取落花東去問花亦漂流良苦花不能言應有
恨恨十分都被春風誤同此恨有飛絮 人生聚散元

無據儘凭欄一樽相對蘋洲春算嫉色沖沖空悵望淚
盡世間兒女君不見千金求賦飛燕婕妤今何在看粘
雲江影傷千古流不去斷冤處

又

送杜子野赴省

說到城南杜儘風流至今人號去天尺五家世聯翩蒼
玉佩自有文章機杼看鸞鳳九霄軒翥文陣堂堂新得
雋正少年壯氣虹霓吐拈彩筆月城去出關相送梅
千樹雪連空馬蹄特特曉寒人度帝里春濃花似海吹

入明光奏賦須快展
亨衢濶步隨世功名真漫浪要平生
所學期無負須記得別時語

歸朝懽

南劍雙溪樓

五月人間揮汗雨離恨一襟何處去
雙溪樓下碧千尋
雙溪樓上匏尊舉晚涼生綠樹
漁燈幾點依洲渚莫狂歌
潭空月淨慘慘瘦蛟舞
變化往來無定所求劍刻舟應笑汝
只今誰是晉司空斗牛奕奕紅光吐
我來空弔古與君同記凭欄語
問滄波乘槎此去流到天河否

又壽蕭禹平知縣

雲表金莖珠璀璨當日投懷驚玉燕
文章議論壓西廳
風流姓字翔東觀
紫皇嗟見晚祥麟
五色畱金殿
大江西
銅章墨綬暫爾煩君綰
十二金釵扶玉盞
錦瑟擬
擬隨急管獸爐烟動彩雲高
秋聲拍碎紅牙板
趣君歸
翰苑
菜衣煥爛潘輿穩
任方瞳從今看到弱水波清淺

又別意

朱戶綠窗深窈窕
閃閃華旗紅幹小
相逢斜柳絆輕舟

渚香不斷蘋花老西風吹夢草題詩未了還驚覺獨傷
心淒涼故館月過西樓悄樓外斜河低浸斗夜已如
何夜將曉心期欲寄赤鱗魚秋雲不動秋江渺相思千
里道多情直被無情惱玉臺前請君試看華髮添多少

水龍吟

題連州翼然亭呈歐守

翼然新搆高亭翰林鐵畫燕公手滁陽盛事何人重繼
湟川太守太守謂誰文章的派醉翁賢胄對千峰削翠
雙溪注玉端不減琅玕秀坐歎清香畫戟聽丁丁滴

花晴漏棠陰晝寂細賡賓客竹枝楊柳只恐明朝綈封
趣覲未容借寇儘江山識賞鹽梅事業煥青瑣舊

又 題天風海濤呈潘料院

飈車飛上蓬萊不須史跨琴高鯉割然長嘯天風瀕洞
雲濤無際我欲乘桴從茲浮海約任公子辦虹竿千丈
糖鈎五十親點對連鰲餌 誰榜佳名空翠紫陽仙去
騎箕尾銀鈎鐵畫龍拏鳳峙畱人間世更憶東山哀箏
一曲洒沾襟淚到而今幸有高亭遺愛寓甘棠意

又題盱江偉觀

城頭傑觀崢嶸重欄下瞰蒼龍脊
鏤珉盤礎彫檀竦案玲瓏金碧華
子岡頭麻源谷口神仙窟宅道至今清夜
月明風冷常隱隱聞笙笛翠壁烟霞縹緲更寒泉飛
空千尺數峰江上孤舟天際夕陽紅溼抖擻征塵浩然
長嘯跨青鸞翼向鳳岡西望遙醺斗酒酌文章伯

李泰伯墓

在鳳凰山下

水調歌頭

上韶州方檢討時有節制之命

慘淡望京闕慷慨夢天山引杯中夜看劒壯氣刷幽燕
鼉鼓滿天催曙画角連雲嘯月吹斷戍餅烟犀角赤兔
馬虎帳綠熊羆仗漢節伸大義伐可汗青冥更下斧
鉞赤子要君安鐵騎千羣觀獵宮樣十眉環座磬礪聽
鳴弦莫厭堯璠冷歸去已貂蟬

木蘭花慢

社日有懷

東風吹霧雨更吹起袂衣寒正莽莽叢林潭潭伐鼓鬱
鬱焚蘭闌干曲多少意看青烟如篆遶溪灣桑柘綠陰

猶薄杏桃紅雨初翻
飛花片片走潺湲
問何日西還
嘆擾擾人生紛紛離合渺渺悲歡想雲輶何處也對芳
時應只在人間惆悵回紋錦字斷腸斜日雲山

蝶戀花

快閣

傑閣青紅天半倚
萬里歸舟更近闌
千艤木落山寒鳬
鴈起一聲漁笛滄洲尾
千古文章黃太史
捫蝨高風
長照冰壺裏
何以薦君秋菊
藥癯瓢為酌西江水

又

春情

院靜日長花氣暖一簇嬌紅得見春深淺風送生香來
近遠笑聲只在秋千畔目力未窮腸已斷一寸芳心
更逐遊絲亂朱戶對開簾捲半日斜江上春風晚

鷓鴣天

怨別

一徑蕭條落葉深離腸淒斷月明砧征鴻送恨連雲起
促織驚秋傷砌吟風悄悄夜沉沉鴛鴦機坐冷曉霜侵
挑成錦字心相向未必君心似妾心

又

閨思

多病春來事事慵
偶因撲蝶到庭中
落紅萬疊花經雨
斜碧千條柳困風
深院宇小簾櫳
幾年離別恰相逢
擎觴未飲心先醉
爲有春愁似酒濃

又別意

行盡春山春事空
別愁離恨滿江東
三更鼓潤官樓雨
五夜燈殘客舍風
寒淡淡曉朧朧
黃雞催斷丑時鐘
紫騮嚼勒金銜響
衝破飛花一道紅

又惜別

一曲危絃斷客腸津橋捩施轉牙檣江心雲帶蒲帆重
樓上風吹粉淚香 瑤草碧柳芽黃載將離恨過瀟湘
請君看取東流水方識人間別意長

又 春思

病去那知春事深流鶯喚起惜春心桐舒碧葉慳三寸
柳引金絲可一尋 憐綉閣對雲岑苦無多力懶登臨
翠羅衫底寒猶在弱骨離支瘦不禁

又 閨情

高杏酣酣出短墙垂楊裊裊蘸池塘文鴛藉草眠春晝
金鯽吹波弄夕陽閑倚鏡理明粧自翻銀葉炷衙香
鳴鞭已過青樓曲不是劉郎定阮郎

又閨情

公子詩成著錦袍王家桃葉舊妖嬈檀槽撻急斜金鴈
綵袖翩躚躡翠翹沈水過懶重燒十分濃醉十分嬌
複羅帳裏春寒少只恐香酥拍漸消

玉樓春

春思

春風只在園西畔
薺菜花繁胡蝶亂
冰池晴綠照還空
香徑落紅吹已斷
意長翻恨遊絲短
盡日相思羅帶
緩寶奩如月不欺人
明日歸來君試看

阮郎歸

春思

腮花輕拂紫綿香
瓊杯初暖粧貪凭
彫檻看鴛鴦無心
上綉床
風絮亂恣輕狂惱人
依舊忙夢隨殘雨下
高唐悠悠春夢長

婆羅門引

春情

花明柳暗一天春色繞朱樓斷鴻聲喚人愁欲問鴻歸
何處身世自悠悠正東風畱滯楚尾吳頭追思舊遊
歎雙鬢颯驚秋可惜等閑孤了酒令花籌斷絃難續謾
題詩分付東流流不到蓬島瀛洲

醉桃源

春景

拍堤春水蘸垂楊水流花片香弄花嚙柳小鴛鴦一隻
隨一隻簾半捲露新粧春衫是柳黃倚欄看處背斜
陽風流暗斷腸

好事近

舟行

曉色未分明
敲動月邊鼉鼓
卯酒一杯徑醉
又別君南浦
春江如席照晴空
大舶夾雙櫓
腸斷斜陽渡口
正落紅如雨

訴衷情

章貢別懷

一聲水調解蘭舟
人間無此愁
無情江水東流去
與我淚爭流
人已遠
更回頭
苦凝眸
斷魂何處
梅花嶺曲
小小紅樓

多麗

記恨

寂無端官樓画角輕吹一聲來深閨深處把人好夢驚
回許多愁儘教奴受此箇事未必君知淚滴蘭衾寒生
珠幌翠雲撩亂枕頻欹窗兒上幾條殘月斜玉界羅帷
更堪聽霜摧敗葉靜扣朱扉念別離千里萬里問何
日是歸期關情處魚來鴈往斷腸是免走烏飛美景良
辰賞心樂事風流孤負縷金衣謾贏得花顏玉骨瘦損
為相思歸須早劉郎雙鬢莫遣成絲

一落索

春懷

清曉鶯啼紅樹又一雙飛去日高花氣撲人來獨自價
傷春無緒別後暗寬金縷倩誰傳語一春不忍上高
樓為怕見分携處

南柯子

暮春

柳陌通雲徑瓊梳啓翠樓桃花紙薄漬水油記得年時
詩句為君畱曉綠千層出春紅一半休門前溪水泛
花流流到西川猶是故家愁

菩薩蠻

雙溪亭

征鴻點破空雲碧
丹霞染出新秋色
返照落平洲
半江紅錦流
風清漁笛晚
寸寸愁腸斷
寄語笛休橫
只消三兩聲

嚴少魯

名參自號三休昭武人

沁園春

自適


曰歸去來歸去來
兮吾將安歸
但有東籬菊
有西園桂

有南溪月有北山薇蜂則有房魚還有穴蟻有樓臺獸
有衣吾應有雲中舊隱竹裏柴扉 人間征路熹微看
處處丹楓白露晞看寒原衰草牛羊來下淡烟秋水鱸
鰕初肥自笑平生頽然骨相只合持竿坐釣磯都休也
對西風無語落日斜暉

又 題吳明仲竹坡

竹焉美哉愛竹者誰曰君子歟向佳山水處築宮一畝
好風煙裏種玉千餘朝引輕霏夕延涼月此外塵埃一

點無須知道有樂其樂者吾愛吾廬竹之清也何如
應料得詩人清矣乎况滿庭秀色對拈彩筆半窗涼影
伴讀殘書休說龍吟莫言鳳嘯且道高標誰勝渠君試
看正遶坡雲氣似渭川圖



花菴詞選續集卷五

欽定四庫全書

集部

花菴詞選續集卷六

詳校官編修

臣周瓊

侍讀臣孫球覆勘

總校官知縣

臣繆

琪

校對官主事

臣

陳文樞

謄錄監生

臣

鄒世俊

欽定四庫全書

花菴詞選續集卷六

宋黃昇輯

宋詞

馬莊父

字子嚴建安人自號古洲居士

水龍吟

為陳坂種玉莊作

買莊為貯梅花玉妃一萬森庭戶古來詞客比方不類
可憐毫楮誰掃塵凡獨超物表神仙中取是崑邱標致

姑山風骨除此外吾誰與
九醞醞雪乳和金盤月
邊清露壽陽驕駭單于疎賤不堪充數弄玉排簫許瓊
揮拍胎禽飛舞待先生披著羊裘鶴氅作園林主

又
海棠

東君直是多情好花一夜都開盡杏梢零落藥欄遲暮
不教寧靜風度秋千日移簾幕翠紅交映正太真浴罷
西施濃抹都沈醉嬌相稱磨徧綠窗銅鏡挽春衫不
堪比並暮雲空谷佳人何處碧苔侵逕睡裏相看酒邊

凝想許多風韻問因何却欠一些香味惹有人恨

臨江仙

上元

人意舒閒春事到徐徐弄日微雲翠鬟飛繞鬧蛾羣煙
橫沽酒市風轉落梅村歲事一新人半舊相逢際晚
醺醺花間亭館柳間門尅除風雨外排日醉紅裙

月華清

憶別

瑟瑟秋聲蕭蕭天籟滿庭搖落空翠數徧丹楓不見葉
間題字人何處千里嬋娟愁不斷一江流水遙睇見征

鴻幾點碧天無際 悵望月中仙桂問竊藥佳人誰與
同歲把鏡當空照盡別離情意心裏恨莫結丁香琴上
曲休彈秋思拍裏又悲來老却蘭臺公子

賀聖朝

春遊

遊人拾翠不知遠被子規呼轉紅樓倒影背斜陽墜幾
聲絃管 荼蘼香透海棠紅淺恰平分春半花前一笑
不須慳待花飛休怨

魚遊春水

怨別

池塘生春草數盡歸鴻人未到天涯目斷青鳥尚賒音
耗曉月頻窺白玉堂暮雨還溼青門道巢燕引雛乳鶯
空老庭際香紅倦掃乾鵲休來枝上噪前回準擬同
它翻成病了欲題紅葉憑誰寄獨抱孤桐無心挑眉間
翠攢鬢邊霜早

海棠春

春景

柳腰暗怯花風弱紅映秋千院落歸逐鴈兒飛斜撼真
珠箔滿林翠葉胭脂夢不忍頻頻覷著護取一庭春

莫彈花間鵲

鷓鴣天

閨思

睡鴨徘徊煙縷長，日高春困不成粧。
步歌草色金蓮潤，撚斷花鬚玉笋香。
輕洛浦，笑巫陽，錦紋親織寄檀郎。
兒家閉戶藏春色，戲蝶遊蜂不敢狂。

末二句
有深意

歸朝懽

春遊

聽得提壺沽美酒，人道杏花深處有。
杏花狼籍鳥啼風，十分春色今無九。
麝煤銷，永書青煙飛上庭前柳。
畫堂

深不寒不煖正是好時候
團團寶月憑纖手暫借歌
喉招舞袖真珠滴破小槽紅香肌縮盡纖羅瘦投分須
白首黃金散與親和舊且銜盃壯心未落風月長相守

孤鸞

早春

沙堤香軟正宿雨初收落梅飄滿可奈東風暗逐馬蹄
輕捲湖波又還漲綠粉墻陰日融煙煖驀地刺桐枝上
有一聲春喚
任酒帘飛動畫樓晚便指數燒燈時節
非遠陌上叫聲好是賣花行院玉梅對粧雪柳鬧娥兒

象生嬌顫歸去爭先戴取倚寶釵雙燕

阮郎歸

西湖春暮

清明寒食不多時香紅漸漸稀
番騰粧束鬧蘇堤留春
春怎知花褪雨絮沾泥
凌波寸寸移三三兩兩
叫船
兒人歸春也歸

姜堯章

名夔號白石道人中興詩家名流詞極精妙
不減清真樂府其間高處有姜成所不能及

善吹簫自製曲初則率意為長短句然後協以音律云居鄱陽

採春慢

過苔雪別鄭次臯諸君

衰草愁煙亂鴉送日風沙回旋平野拂雪金鞭欺寒茸
帽還記章臺走馬誰念漂零久謾贏得幽懷難寫故人
清沔相逢小窗間共情話長恨離多會少重訪問竹
西珠淚盈把鴈磧沙平漁汀人散老去不堪遊冶無奈
苔溪月又喚我扁舟東下甚日歸來梅花亂零春夜

一萼紅 人日長沙登定王臺

古城陰有官梅幾許紅萼未宜簪池面冰膠牆腰雪老
雲意還又沉沉翠藤共閒穿徑竹漸笑語驚起卧沙禽
野老林泉故王臺榭呼喚登臨南去北來何事蕩湘
雲楚水目極傷心朱戶黏雞金盤簇燕空嘆時序侵尋
記曾共西樓雅集想垂柳還裊萬絲金待得歸鞍到時
只怕春深

揚州慢

中呂宮 淳熙丙申至日余過維揚夜
雪初霽齊麥彌望入其城則四顧蕭條

寒水自碧暮色漸起戍角悲吟予懷愴然感慨今昔因自度此曲千巖老人以爲有黍離之悲也作此後凡載宮調者並是自製曲

淮左名都竹西佳處解鞍少駐初程過春風十里盡齊
麥青青自朔馬窺江去後廢池喬木猶厭言兵漸黃昏
清角吹寒都在空城杜郎俊賞算如今重到須驚縱
荳蔻詞工青樓夢好難賦深情二十四橋仍在波心蕩
冷月無聲念橋邊紅藥年年知爲誰生

驀山溪

題錢氏溪月

與鷗為客綠野留吟屐兩行柳垂陰是當年仙翁手植
園亭寂寞煙外帶愁橫荷冉冉展涼雲橫卧虹千尺
才因老盡秀句君休覓萬綠正迷人更愁入山陽夜笛
百年心事惟有玉欄知吟未了放船回月下空相憶

點絳脣

丁未冬過吳淞

燕鴈無心太湖西畔隨雲去數峰清苦商畧黃昏雨

第四橋邊擬共天隨住今何許凭欄懷古殘柳參差舞

暗香

仙呂宮 辛亥之冬予載雪詣石湖止既
月授簡索句且徵新聲作此兩曲石湖把

玩不已使二妓隸習之音節
諧婉乃命之曰暗香疎影

舊時月色算幾番照我梅邊吹笛喚起玉人不管清寒
與攀摘何遜而今漸老都忘却春風詞筆但怪得竹外
疎花香冷入瑤席江國正寂寂嘆寄與路遙夜雪初
積翠尊易泣紅萼無言耿相憶長記曾攜手處千樹壓
西湖寒碧又片片吹盡也幾時見得

疎影

仙呂宮

苔枝綴玉有翠禽小小枝上同宿客裏相逢籬角黃昏

無言自倚修竹，昭君不慣龍沙。遠但暗憶江南江北想。
佩環月夜歸來，化作此花幽獨。猶記深宮舊事，那人
正睡裏飛近蛾綠。莫似春風，不管盈盈早與安排金屋。
還教一片隨波去，又却怨玉龍哀曲。等恁時重覓幽香，
已入小窗橫幅。

長亭怨慢

中呂宮 桓大司馬云昔年種柳依
依漢南，今看摧落，悵江潭樹猶如

此人何以堪此
語予深愛之

漸吹盡枝頭香絮，是處人家綠深門戶。遠浦縈回暮帆

零亂向何許閱人多矣誰得似長亭樹樹若有情時不
會得青青如此日暮望高城不見只見亂山無數韋
郎去也怎忘得玉環分付第一是早早歸來怕紅苔無
人為主算只有并刀難剪離愁千縷

齊天樂

蟋蟀中都呼為促織

庾郎先自吟愁賦淒淒更聞私語露濕銅鋪苔侵石井
都是曾聽伊處哀音似訴正思婦無眠起尋機杼曲曲
屏山夜涼獨自甚情緒西窗又吹暗雨為誰頻斷續

相和砧杵候館吟秋離宮弔月別有傷心無數幽詩謾
與笑籬落呼燈世間兒女寫入琴絲一聲聲更苦

宣政間有

士大夫製
蟋蟀吟

小重山令

潭州紅梅

人繞湘臯月墜時斜橫花樹小浸愁漪一春幽事有誰
知東風冷香遠茜裙歸鷗去昔遊非遙憐花可可夢
依依九疑雲杳斷魂啼相思血都沁綠筠枝

鷓鴣天

元夕不出

憶昨天街預賞時，柳慳梅小未教知。而今正是歡遊夕，
却怕春寒自掩扉。簾寂寂，月低低，舊情唯有絳都詞。
芙蓉影暗三更後，卧聽鄰娃笑語歸。

又 茗溪記所見

京洛風流絕代人，因何風絮落溪津。籠鞋淺出鴉頭鞮，
知是凌波縹緲身。紅乍笑，綠長嚔，與誰同度可憐春。
鴛鴦獨宿何曾慣，化作西樓一縷雲。

又 十六夜遊

輦路珠簾兩行垂千枝銀燭舞僛僛東風歷歷紅樓下
誰識三生杜牧之歡正好夜何其明朝春過小桃枝
鼓聲漸遠遊人散惆悵歸來有月知

憶王孫

番陽彭氏小樓

冷紅葉葉下塘秋長與行雲共一舟零落江南不自由
雨綢繆料得吟鸞夜夜愁

湘月

雙調即念奴嬌之馬指聲也

五湖舊約問經年底事長負清景暝入西山漸喚我一

葉夷猶乘興倦網都收歸禽時度月上汀洲冷中流容
與畫橈不點清鏡誰解喚起湘靈煙鬟霧鬢理哀絃
鴻陣玉塵談玄歎坐客多少風流名勝暗柳蕭蕭飛星
冉冉夜久知秋信鱸魚應好舊家樂事誰省

念奴嬌

吳興荷花

開紅一舸記來時嘗與鴛鴦為侶三十六陂人未到水
佩風裳無數翠葉吹涼玉容銷酒更洒菰蒲雨嫣然搖
動冷香飛上詩句日暮青蓋亭亭情人不見爭忍凌

波去只恐舞衣寒
易落愁入西風南浦
高柳垂陰老魚
吹浪畱我花間住
田田多少幾回沙際歸路

惜紅衣

吳興荷花

無射宮

簾枕邀涼琴書換日
睡餘無力細洒水泉并刀破甘碧
牆頭喚酒誰問訊城南詩客
岑寂高樹晚蟬說西風消息
虹梁水陌魚浪吹香紅衣半狼籍
維舟試望故國
渺天北可惜柳邊沙外不共美人遊
歷問甚時同賦三十六陂秋色

琵琶仙

吳興感遇

雙槳來時有人似舊曲桃根桃葉歌扇輕約飛花蛾眉
正奇絕春漸遠汀洲自綠更添了幾聲啼鴂十里揚州
三生杜牧前事休說又還是宮燭分烟奈愁裏匆匆
換時節都把一襟芳思與空階榆英千萬縷藏鴉細柳
為玉尊起舞回雪想見西出陽關故人初別

秋宵吟

越調

秋夜

古簾空墜月皎坐久西窗人悄蛩吟苦漸漏永丁丁箭

壺催曉引涼颼動翠葆露脚斜飛雲表因嗟念似去國
情懷暮帆煙草帶眼銷磨為近日愁多頓老衛娘何
在宋玉歸來兩地暗縈繞搖落江楓早嫩約無憑幽夢
又杳但盈盈淚洒單衣今夕何夕恨未了

少年遊

戲張平甫

雙螺未合雙蛾先歛家在碧雲西別母情懷隨郎滋味
桃葉渡江時扁舟載了匆匆去今夜泊前溪楊柳津
頭梨花牆外心事兩人知

鬲溪梅令

仙呂調

無錫歸寓意

好花不與殢香人。浪粼粼。又恐春風歸去，綠成陰。玉鈿
何處尋。木蘭雙槳夢中雲。小橫陳。謾向孤山山下覓
盈盈翠禽啼一春。

淒涼犯

仙呂調 犯商調

合肥秋夕

綠陽巷陌西風起。邊城一片離索。馬嘶漸遠，人歸甚處，
戍樓吹角。情懷正惡。更哀草寒煙淡薄。似當時、將軍部
曲，迤邐度沙漠。追念西湖上，小舫携歌，晚花行樂。舊

遊在否想如今翠凋紅落謾寫羊裙等新鴈來時繫著
怕匆匆不肯寄與悞後約

翠樓吟

雙調

武昌安遠樓成

月冷龍沙塵清虎落今年漢酺初賜新翻蕃部曲聽
幕元戎歌吹層樓高峙看檻曲縈紅簷牙飛翠人姝麗
粉香吹下夜寒風細此地宜有詞仙擁素雲黃鶴與
君遊戲玉梯凝望久歎芳草萋萋千里天涯情味仗酒
被清愁花嬌英氣西山外晚來還捲一簾秋霽

清波引

梅

冷雲迷浦倩誰喚玉妃起舞歲華如許野梅弄眉嫵
屐齒印蒼蘚漸為尋花來去自隨秋鴈南來望江國渺何處
新詩謾與好風景長是暗度故人知否抱幽恨難
語何時共漁艇莫負滄浪烟雨況有清夜啼猿怨人良
苦

法曲獻仙音

張彥功官舍

虛閣籠寒小簾通月暮色偏憐高處樹隔離宮水平馳

道湖山盡入尊俎奈楚客淹留久砧聲帶愁去屢回顧
過秋風未成歸計誰念我重見冷楓紅舞喚起淡粧
人問逋仙今在何許象筆驚牋甚而今不道秀句怕平
生幽恨化作沙邊煙雨

玲瓏四犯

越中歲暮聞蕭鼓感懷

疊鼓夜寒垂燈春淺匆匆時事如許倦遊歡意少俛仰
悲今古江淹又吟恨賦記當時送君南浦萬里乾坤百
年身世惟有此情苦 揚州柳垂官路有輕盈喚馬端

正窺戶酒醒明月下夢逐潮聲去文章信美知何用謾
贏得天涯羈旅教說與春來要尋花伴侶

淡黃柳

正平調近

客合肥

空城曉角吹入垂陽陌馬上單衣寒惻惻看盡鵝黃嫩
綠都是江南舊相識正岑寂明朝又寒食強携酒小
橋宅怕梨花落盡成秋色燕燕飛來問春何在唯有池
塘自碧

側犯

詠芍藥

恨春易去甚春却向揚州住微雨正繭栗梢頭弄詩句
紅橋二十四總是行雲處無語漸半脫宮衣笑相顧
金壺細葉千朵圍歌舞誰念我鬢成絲來此共尊俎後
日西園綠陰無數寂寞劉郎自修花譜

眉嫵

亦名百宜嬌

戲張仲遠

看垂楊連苑杜若吹沙愁損未歸眼信馬青樓去重簾
下娉婷人妙飛燕翠尊共款聽艷歌郎意先感便携手
月地雲堦裏愛良夜微煖無限風流疎散有暗藏弓

履偷寄香翰明日聞津鼓湘江上催人還解春纜亂紅
萬點悵斷魂煙水遙遠又爭似相携乘一舸鎮長見

石湖仙

越調

壽石湖居士

松江烟浦是千古三高遊衍佳處須信石湖仙侶鷗夷
翩然引去浮雲安在我自愛綠香紅舞容與看世間幾
度今古 盧溝舊曾駐馬為黃花間吟秀句見說燕歌
也學綸巾歌雨玉友金蕉玉人金縷緩移箏柱聞好語
明年定在槐府

解連環

玉鞍重倚却沉吟未上又縈離思為大喬能撥春風小
喬妙移箏鴈啼秋水柳怯雲鬆更何必十分梳洗道郎
携羽扇那日隔簾半面曾記西窗夜涼雨霽歎幽歡
未足何事輕棄問後約空指薔薇算如此溪山甚時重
至水驛燈昏又見在曲屏近平聲底念惟有夜來皓月照
伊自睡

玉梅令

高平調

石湖畏寒不出作此戲之

疎疎雲片散入溪南苑春寒鎖舊家亭館有玉梅幾樹
背立怨東風高花未吐暗香已遠公來領客梅花能
勸花長好願公更健便揉春為酒剪雪作新詩拚一日
繞花千轉

踏莎行 金陵感夢

燕燕輕盈鶯鶯嬌軟分明又向華胥見夜長爭得薄情
知春初早被相思染別後書詞別時針線離魂暗逐
郎行遠淮南皓月冷千山冥冥歸去無人管

八歸

湘中送胡德華

芳蓮墜粉疎桐吹綠庭院暗雨乍歇無端抱影銷魂處
還見篠牆螢暗蘚階蛩切送客重尋西去路問水面琵琶誰撥最可惜一片江山總付與啼鴉長恨相從未
款而今何事又對西風離別渚寒煙淡棹移人遠縹緲
行舟如葉想文君望久倚竹愁生步羅襪歸來後翠尊
雙飲下了珠簾玲瓏間看月

高賓王

名觀國號竹屋詞名竹屋癡語陳造為序稱
其與史邦卿皆秦周之詞所作要是不經人
道語其妙處少游美成若唐諸公亦未及也

玉胡蝶

秋思

喚起一襟涼思未成晚雨先做秋陰楚客悲殘誰解此
意登臨古臺荒斷霞斜照新夢黯微月疎砧總難禁盡
將幽恨分付孤斟從今倦看青鏡既遲勲業可負煙
林斷梗無憑歲華搖落又驚心想萼汀水雲愁凝閒蕙

帳猿鶴悲吟信沈沈故園歸計休更侵尋

喜遷鶯

秋懷

涼雲歸去再約著晚來西樓風雨水靜簾陰鷗閒孤影
秋到露汀煙浦試省喚回幽恨盡是愁邊新句倦登眺
動悲涼還在殘蟬吟處淒楚空見說香鎖霧扃心似
秋蓮苦寶瑟彈冰玉臺窺月淺黛可憐偷聚幾時翠溝
題葉無復繡簾吹絮鬢華晚念庾郎情在風流誰與

玉樓春

春思

多時不踏章臺路依舊東風芳草渡鶯聲喚起水邊情
日影炙開花上霧謝娘不信佳期誤認得馬嘶迎繡
戶今宵翠被不春寒只恐香穠春又去

又憶舊

春煙澹澹生春水曾記芳洲蘭棹艤岸花香到舞衣邊
汀草色分歌扇底棹沉雲去情千里愁壓雙鴛飛不
起十年春事十年心怕說濺裙當日事

菩薩蠻蘇堤芙蓉

紅雲半壓秋波急，艷粧泣露嬌啼色。
佳夢入仙城，風流石曼卿。
宮袍呼醉醒，休捲西風錦。明日粉香殘，六橋烟水寒。

又 水晶簪

玉鱗熬出香凝軟，并刀斷處冰絲顫。
紅縷間堆盤，輕明相映寒。
纖柔分勸處，膩滑難停筯。
一洗醉魂清，真成醒酒冰。

又 春思

春風吹綠湖邊草春光依舊湖邊道玉勒錦障泥少年
遊冶時煙明花似繡且醉旗亭酒斜日照花西歸鴉
花外啼

杏花天

春愁

霽煙消處寒猶嫩乍門巷悵悵書永池塘夢草魂初醒
秀句吟春未穩仙源阻春風瘦損又燕子來無芳信
小桃也自知人恨滿面羞紅難問

祝英臺近

閨思

一牕閒孤燼冷獨自箇春睡繡被熏香不似舊風味靜
聽滴滴簷聲驚愁攪夢更不管庾郎心醉念芳意一
併十日春寒梅花曬憔悴懶做新詞春在可憐裏幾時
挑菜踏青雲沈雨斷盡分付楚天之外

生查子

梅

香驚楚驛寒瘦倚湘筠暮一笛已黃昏片月尤清楚
沉沉冰玉魂漠漠煙雲浦酸淚不成彈又向春心聚

永遇樂

次韻弔青樓

淺暈修蛾脆痕紅粉猶記窺戶香斷奩空塵生砌冷誰
喚青鸞舞春風花信秋宵月約歷歷此心曾許銜芳恨
千年怨結玉骨未應成土 木蘭艇子莫愁何在謾繫
寒江煙樹事逐雲沈情隨佩冷短夢分今古一杯遙夜
孤光難曉多少碎人腸處空淒黯西風細雨盡吹淚去

御街行

賦轎

藤筠巧織花紋細稱穩步如流水踏青陌上雨初晴嫌
怕濕文鴛雙履要人送上逢花須住才過處香風起

裙兒挂在簾兒底更不把窗兒閉紅紅白白簇花枝恰
稱得尋春芳意歸來時晚紗籠引道扶下人微醉

霜天曉角

春情

春雲粉色春水和雲濕試問西湖楊柳東風外幾絲碧
望極連翠陌蘭橈雙槳急欲訪莫愁何處旗亭在畫
橋側

卜算子

春晚

屈指數春來彈指驚春去簷外蛛絲網落花也要留春

住 幾日喜春晴
幾夜愁春雨
十二彫牕六曲屏
題徧傷春句

踏莎行

九日西山

水減堤痕秋生屐齒瘦
筇喚起登高意
翠微烟冷夢淒涼
黃花香晚人憔悴
懷古風流悲秋情味
紫萸勸入旗亭
醉玉人相見說新愁
可憐又濕西風淚

風入松

春晴

捲簾日日恨春陰
寒食新晴馬蹄只向南山去
長橋愛

花柳多情紅外風嬌日暖翠邊水秀山明 杜郎歌酒
過平生到處蓬瀛醉魂不入重城晚穠歡寄桃葉桃根
繡被嫩寒清曉鶯聲喚醒春醒

又聞隣女吹笛

粉嬌曾隔翠簾看橫玉聲寒夜深不管柔荑冷櫻朱度
香噴雲鬟霜月搖搖吹落梅花簌簌驚殘 蕭郎且放
鳳簫閒何處驂鸞靜聽三弄霓裳罷魂飛斷愁裏關山
三十六宮天近念奴却在人間

思佳客

秋扇

入手西風意已秋，不須玉斧為重修。
撲螢涼夜沉沉月，障面清歌澹澹秋。
休棄置，且遲留，可憐又向篋中收。
莫教暗損乘鸞女，漢殿淒涼萬古愁。

聲聲慢

元夕

壺天不夜，寶炬生香，光風蕩搖金碧。
月灑冰痕，花外峭寒無力。
歌傳翠簾盡捲，誤驚回、瑤臺仙跡。
禁漏促，拚千金一刻，未酬佳夕。
捲地香塵不斷，最得意輸他五陵。

狂客楚柳吳梅無限眼邊春色鮫綃暗中寄與待重尋
行雲消息乍醉醒怕南樓吹斷曉笛

解連環

春水

浪搖新綠浸芳洲翠渚雨痕初足蕩霽色流入橫塘看
風外漪漪皺紋如縠藻荇縈迴似畱戀鴛飛鷗浴愛嬌
雲蘸色媚日按藍遠迷心目仙源漾舟岸曲照芳容
幾樹香浮紅玉記那回西洛橋邊濺裙翠傳情玉纖輕
掬三十六陂錦鱗渺芳音難續隔垂楊故人望斷浸愁

千斛

花菴詞選續集卷六

欽定四庫全書

花菴詞選續集卷七

宋黃昇輯

宋詞

史邦卿

名達祖號梅溪有詞百餘首張功父姜堯章
為序堯章稱其詞奇秀清逸有李長吉之風
韻

綺羅香

春雨

做冷欺花將煙困柳千里偷催春暮盡日冥迷愁裏欲
飛還住驚粉重蝶宿西園喜泥潤燕歸南浦最妨他佳
約風流鈿車不到杜陵路沈沈江上望極還被春潮
急難尋官渡隱約遙峰和淚謝娘眉嫵臨斷岸新綠生
時是落紅帶愁流處記當日門掩梨花剪燈深夜語

臨斷

岸以下數語最
為堯章所歎賞

玉樓春

社前一日

遊人等得春晴也處處旗亭堪繫馬雨前穠杏尚娉婷

風裏殘梅無顧藉 忘拈針線還逢社 鬪草羸多裙欲
卸 明朝雙燕定歸來 叮囑重簾休放下

又 梨花

玉容寂寞誰為主 寒食新晴愁幾許 前身清淡似梅粧
遙夜依微畱月住 香迷胡蝶飛時路 雪在秋千來往
處 黃昏著了素衣裳 深閉重門聽夜雨

萬年歡 春思

兩袖梅風謝橋邊岸痕猶帶陰雪過了匆匆燈市草根

青發燕子春愁未醒悞幾處芳音遼絕煙溪上采綠人
歸定應愁沁花骨 非干厚情易歇奈燕臺句老難道
離別小逕吹衣曾記故里風物多少驚心舊事第一是
侵階羅襪如今但桺髮晞春夜來和露梳月

杏花天

清明

軟波拖碧浦芽短畫橋外花晴柳暖今年自是清明晚
便覺芳情較懶 春衫瘦東風剪剪過花塢香吹醉面
歸來立馬斜陽岸隔岸歌聲一片

西江月

閨思

西月澹窺樓角東風暗落簷牙一燈初見影窗紗又是
重簾不下幽思屢隨芳草間愁多似楊花楊花芳草
徧天涯繡被春寒夜夜

菩薩蠻

夜景

梨花不礙東城月月明照見空欄雪雪底夜香微褰簾
拜月歸錦衾幽夢短明日南堂宴宴罷小樓臺春風
來不來

臨江仙

閨思

卷七

愁與西風應有約年年同赴清秋舊游簾幕記揚州一
燈人著夢雙鴈月當樓羅帶鴛鴦塵暗澹更須整頓
風流天涯萬一見溫柔瘦應緣此瘦羞亦為郎羞

齊天樂

秋興

闌干只在鷗飛處年年怕吟秋興斷浦沈雲空山挂雨
只有詩愁千頃波聲未定望舟尾拖涼渡頭籠暝正好
登臨有人歌罷翠簾冷悠然魂墮故里奈閑情未了

還被吹醒拜月虛簷聽蛩壞砌誰復能憐嬌俊憂心耿
耿寄桐葉芳題冷楓新詠莫遣秋聲樹頭喧夜永

又

湖上即席分韻得羽字

鴛鴦拂破蘋花影低低趁涼飛去畫裏移舟詩邊就夢
葉葉碧雲分雨芳游自許過柳影閒波水花平渚見說
西風為人吹恨上瑤樹闌干斜照未滿杏牆應望斷
春翠偷聚淺約按香深盟搗月誰是窗間青羽孤箏幾
柱問因甚參差斲成離阻夜色空庭待歸聽俊語

雙雙燕

詠燕

形容盡矣

卷七

過春社了度簾幕中間去年塵冷差池欲住試入舊巢
相並還相雕梁藻井又軟語商量不定飄然快拂花梢
翠尾分開紅影芳徑芹泥雨潤愛貼地爭飛競誇輕
俊紅樓歸晚看足柳昏花暝應自棲香正穩便忘了天
涯芳信愁損翠黛雙蛾日日畫欄獨凭

姜堯章極稱其
柳昏花暝之句

東風第一枝

春雪

巧剪蘭心偷黏草甲東風欲障新暖謾凝碧瓦難畱信

知暮寒較淺行天入鏡做弄出輕鬆纖軟料故園不捲
重簾悞了乍來雙燕青未了柳回白眼紅欲斷杏開
素面舊遊憶着山陰厚盟遂妨上苑寒爐重煖便放慢
春衫針線恐鳳鞋挑菜歸來萬一灞橋相見

結句尤為
姜堯章拈

出

又
元夕

酒館歌雲燈街舞繡笑聲喧似簫鼓太平京國多歡大
酺綺羅幾處東風不動照花影一天春聚耀翠光金縷

相交冉冉細吹香霧 羞醉玉少年丰度懷豔雪舊家
伴侶閉門明月關心倚窻小梅索句吟情欲斷念嬌俊
知人無據想袖寒珠絡藏香夜久帶愁歸去

換巢鸞鳳

春情

人若梅嬌正愁橫斷塢夢繞溪橋倚風融漢粉坐月怨
秦簫相思因甚到纖腰定知我今無魂可銷佳期晚謾
幾度淚痕相照 人悄天渺渺花外語香時透郎懷抱
暗握萸苗乍嘗櫻顆猶恨侵堦芳草天念王昌忒多情

換巢鸞鳳教偕老溫柔鄉醉芙蓉一帳春曉

過龍門

春愁

醉月小紅樓錦瑟瑩篴夜來風雨曉來收幾點落花饒
柳絮同為春愁 寄信問晴鷗誰在芳洲綠波寧處有
蘭舟獨對舊時携手地情思悠悠

瑞鶴仙

紅梅

館娃春睡起為發粧酒煖臉霞輕膩冰霜一生裏厭從
來冷澹粉腮重洗胭脂暗試便無限芳穠氣味向黃昏

竹外寒深醉裏為誰偷倚
嬌媚春風模樣霜月心腸
瘦來肌體孤香細細吹夢到杏花底被高樓橫筦一聲
驚斷却對南枝灑淚謾相思桃葉桃根舊家姊妹

滿江紅

九月廿一日出京懷古

緩轡西風歎三宿遲遲行客桑梓外鋤耰漸入柳坊花
陌雙闕遠騰龍鳳影九門空鎖鴛鴦翼更無人擲笛倚
宮牆苔花碧天相漢民歸國天厭禍臣同德赴建瓴
一舉再收鰲極老子豈無經世術詩人不預平戎策辦

一襟風月看升平吟春色

卓稼翁

名田號西山建陽之文士

好事近

三衢買舟

奏賦謁金門行盡雲山無數尚有江天一半買扁舟東
去波神眼底識英雄閣住半空雨喚起一帆風力去
青天尺五

昭君怨

送人赴上庠

千里功名岐路幾
緬英雄草履八座與三台箇中來
壯士寸心如鐵有淚不需離別劍未斬樓蘭莫空還

品令

新秋

立秋十日早露出新涼面斜風急雨戰退炎光一半月
上紗窗疑是廣寒宮殿無端宋玉撩亂生悲怨一年
好處都被秋光占斷你且思量今夜怎生消遣

崔正子

名與之自號菊坡屢以右相召不起

水調歌頭

萬里雲間戍立馬劍門關亂山極目無際直北是長安
人苦百年塗炭鬼哭三邊鋒鏑天道久應還手寫留屯
奏炯炯寸心丹對青燈搔白髮漏聲殘老來勲業未
就妨却一身閒梅嶺綠陰青子蒲澗清泉白石怪我舊
盟寒烽火平安夜歸夢到家山

魏華父

名了翁臨邛人號鶴山先生慶元己未黃甲

第三名晚與真西山齊名有詞附鶴山集皆
壽詞之得體者

水調歌頭

范靖州生日

猶記端門外鞭袖五更寒一聲天上鍾柝金鎖掣重關
君向紫宸上閣我侍玉皇香案都號舍人班夢覺帝鄉
遠相對兩蒼顏玉圍腰金繫肘繡籠鞍鄉人袞袞嚴
近五馬度荆山收拾五湖氣度卷束蟠冑兵甲春意滿
人間天錫公純嘏氣象自平寬

又 孫靖州生日

九十九峰下百二十年州西風吹起客夢月滿驛南樓
影入天河左界辰在壽星向上還是去年秋要和木蘭
曲載酒壽君侯 天邊信雲外步去難留壽觴庭院依
舊已帶別離愁離合鍾情未免富貴關人何事浪白世
間頭將相時來作身健百無憂

鷓鴣天

范靖州十月廿一日生日

誰把璿璣運化工參旗又挂玉梅東三三律琯聲餘亥

九九玄經卦起中 新歲月舊遊從一觴還似去年冬

人間事會無終極分付翹聞老令公

郭令公以武舉出身應翹聞負米科

菩薩蠻

靖倅江垧生日

東窗五老峰前月南窻九疊坡前雪堆出侍郎山著君
窗戶間 離騷鄉裏住恰記庚寅度挹取芷蘭芳酌君
千歲觴

劉潛夫

名克莊甫田人號後村先生負一代盛名詩

文甚高有後村別調一卷淳祐辛丑八月御
筆劉某文名久著史學尤精可特賜同進士

出身

六州歌頭

牡丹

維摩病起兀坐等枯株
清晨裏誰來問是文殊
遣名姝奪盡羣芳色
浴才出醒初解千萬態
嬌無力困相扶
絕代佳人不入金張室
却訪吾廬對茶鐺
禪榻笑殺此翁癯
珠髻金壺始消渠
憶承平日繁華事
修成譜寫成

圖奇絕甚歐公記蔡公書古來無一自京華隔問姚魏
竟何如多應是綵雲散劫灰餘野鹿銜將花去空回首
河洛邱墟謾傷春弔古夢遶漢唐都歌罷欵欵

水調歌頭

和西外判宗湖樓韻

君看郭西景渾不減孤山飛樓突兀百尺輪奐侈前觀
絕唱新詞寡和墮淚舊碑無恙往事付驚濤不見遼鶴
返惟對水鷗閒又何必珠翠盛管絃歡唾壺塵尾滿
灑領客上高寒丞相功存宗廟祭酒義兼家國世事尚

相關風月寓意耳莫作晉人看

沁園春

夢方孚若

何處相逢登寶釵樓訪銅雀臺喚厨人斫就東溟鯨鱠
圉人呈罷西極龍媒天下英雄使君與操餘子誰堪共
酒盃車千乘載燕南代北劍客奇材飲酣鼻息如雷
誰信被晨雞輕喚回嘆年光過盡功名未立書生老去
機會方來使李將軍遇高皇帝萬戶侯何足道哉披衣
起但淒涼感舊慷慨生哀

又送包尉

我羨君歸一路秋風芙蓉木犀想慈顏望久靈烏乍噪
新眉畫就郎馬頻嘶忙脫征衫快呼斗酒細為家人說
建谿爭知道這中年懷抱最怕分携 丈夫南北東西
應笑殺離筵粉淚啼悵佳人來未碧雲冉冉王孫去後
芳草萋萋明日相思山重水複古道稀茅店雞元龍
老有高樓百尺誰共登梯

又寄鍾賢良

我夢見君戴飛霞冠著宮錦袍與牧之高會齊山詩酒
謫仙同載采石風濤萬卷星羅千篇電掃肯學窮兒事
楚騷掀髯嘯有魚龍鼓舞狐兔悲嗥英雄埋沒蓬蒿
誰摸索當年劉與曹嘆事機易失功名難偶誅茅西崦
種秫東臯柵有雞豚庭無羔鴈道是先生索價高人間
窄待相期海上共摘蟠桃

又 贈孫季蕃弔方潛西歸

歲莫天寒一見飄然幅巾布裘儘緣雲鳥道躋攀絕頂

拍天鯨浸笑傲中流疇昔奇君紫髯鐵面生子當如孫
仲謀誰知道向中年猶未建節封侯南來萬里何求
因感慨橋公成遠遊悵名姬駿馬都成昨夢隻雞斗酒
誰弔新邱天地無情功名有命千古英雄只麼休平生
客獨羊曇一箇灑淚西州

又寄九華葉賢良

一卷陰符二石硬弓百斤寶刀更玉花驄噴鳴鞭電抹
烏絲欄展醉墨龍跳牛角書生虬鬚豪客談笑皆堪折

簡招依稀記曾請纓繫粵草檄征遼 當年目視雲霄
誰信道淒涼今折腰悵燕然未勒南歸草草長安不見
北望迢迢老去胷中有些磊塊歌罷猶須著酒澆休休
也但帽邊鬢改鏡裏顏凋

摸魚兒

賞海棠

甚春來冷煙淒雨朝朝遲了芳信驀然作煖晴三日又
覺萬株嬌困霜點鬢潘令老年年不帶看花分才情減
盡悵玉局飛仙石湖絕筆辜負這風韻 傾城色懊惱

佳人薄命牆頭岑寂誰問東風日暮無聊賴吹得胭脂
成粉君細認花共酒古來二事天尤吝年光去迅謾綠
葉成陰青苔滿地做取異時恨

又感歎

怪新年倚樓看鏡清狂渾不如舊暮雲千里傷心處那
更亂蟬踈柳凝望久愴故國百年陵闕誰回首功名大
謬歎采藥名山讀書精舍此計幾時就封侯事久矣
輸人妙手滄洲聊作漁叟高冠長劒渾閒物世上切身

惟酒千載後君試看拔山扛鼎俱烏有英雄骨朽問顧
曲周郎而今還解來聽小詞否

念奴嬌

菊花

老夫白首尚兒嬉廢圃一番料理餐飲落英并墜露重
把離騷拈起野艷幽香深黃淺白占斷西風裏飛來雙
蝶遶叢欲去還止 嘗試銓次羣芳梅花差可伯仲之
間耳佛說諸天金色界未必莊嚴如此尚友靈均定交
元亮結好天隨子籬邊坡下一杯聊泛霜蘂

賀新郎

寄題聶侍郎鬱孤臺

絕頂規危榭跨高寒鳥飛不過雲生其下斤斲無聲人
按堵翕忽青紅變化覽城郭山川如畫閣老鳳樓修造
手笑談間突出凌雲厦臺上景買無價唾壺塵尾登
臨暇似當年滌陽太守歐陽公也傾倒贛江供硯滴判
斷雪天月夜更喚起鄒枚司馬銅雀凌歊歌舞散訪殘
磚斷甃無存者餘翰墨被風雅

又

春景

動地東風起畫橋西繞溪桑柘漫山桃李寂寂牆陰蒼
苔逕猶印前回屐齒驚歲月飈馳雲駛太息攀翻長亭
樹是先生手種今如此君不樂欲何俟 倚人錯會淵
明意笑斯翁皇皇汲汲登山臨水佳處徑呼籃輿去彷彿
柴桑栗里從我者門生兒子嘗試平章先賢傳屈原
醒不似劉伶醉判茗芋卧花底

又 客贈芍藥

一夢揚州事畫堂深金瓶萬朶元戎高會座上祥雲層

層起不減洛中姚魏歎別後關山迢遞國色天香何處
在想東風猶憶狂書記驚歲月一彈指數枝清曉頰
馳騎向小窗依稀重見蕪城妖麗料得花憐儂消瘦儂
亦憐花顚顚謾悵望竹西歌吹老矣應無騎鶴日但春
衫點點當時淚那更有舊情味

又送陳子華赴真州

北望神州路試平章這場公事怎生分付記得太行山
百萬曾入宗爺駕馭今把作握蛇騎虎君去京東豪傑

喜想投戈下拜真吾父談笑裏定齊魯
兩河蕭索惟狐兔問當年祖生去後有人來否多少新亭揮淚客誰
夢中原塊土算事業須由人做應笑書生心膽怯向車
中閉置如新婦空目送塞鴻去

又端午

深院榴花吐畫簾開練衣紈扇午風清暑兒女紛紛夸
結束時樣釵符艾虎早已有游人觀渡老大逢場慵作
戲任陌頭年少爭旗鼓溪雨急浪花舞靈均標致高

如許憶生平既紉蘭佩更懷椒糈誰信騷魂千載後波
底垂涎角黍又說是蛟饒龍怒把似而今醒到了料當
年醉死差無苦聊一笑弔千古

又

九日

湛湛長空黑更那堪斜風細雨亂愁如織老眼平生空
四海賴有高樓百尺看浩蕩千崖秋色白髮書生神州
淚儘淒涼不向牛山滴追往事去無迹少年自負凌
雲筆到而今春華落盡滿懷蕭瑟常恨世人新意少愛

說南朝狂客把破帽年年拈出若對黃花孤負酒怕黃
花也笑人岑寂鴻北去日西匿

又遊水東周家花園

溪上收殘雨倚危欄薄綿乍脫日陰亭午鬧市不知春
色處散在荒園廢墅漸小白長紅無數客子雖非河陽
令也隨緣暫作鶯花主那可負甕中醕碧雲四合千
巖莫恨匆匆余方有事子姑歸去趁取羣芳未搖落暇
日提魚就煮歎激電光陰如許回首明年何處在問桃

花尚記劉郎否公莫笑醉中語

又 郡會聞妓歌有感

妾出於微賤少年時朱絃彈絕玉笙吹徧粗識國風關
雎亂羞學流鶯百轉總不涉閨情春怨誰向西鄰公子
說要珠鞍迎入梨花院身未動意先懶 主家十二樓
連苑那人人靚粧按曲繡簾初捲道是畫堂簫管笑
殺街坊拍袞回首望侯門天遠我有平生離鶯操頗哀
而不愠微而婉聊一奏更三歎

生查子 上元戲陳敬叟

繁燈奪霽華，戲鼓侵明發。
物色舊時同，情味中年別。
淺畫鏡中眉，深拜樓西月。
人散市聲收，漸入愁時節。

臨江仙 種海棠作

落魄長官江海客，少豪萬里尋春。
而今憔悴向溪濱。
斷無觴詠興，惟有簿書塵。
手插海棠三百本，等閒粧點。
芳辰他年絳雪映紅雲。
丁寧風與月，記取種花人。

滿江紅 送王實之

天壤王郎數人物方今第一談笑裏風霆驚座雲煙生
筆落落元龍湖海氣琅琅董相天人策問如何十載尚
青衫諸侯客 易愛底些官職難保底些名節擬閉門
投轄劇談三日疇昔評君天下寶當為天下蒼生惜向
臨分慷慨出商聲摧金石

又 二月二十四夜飲海棠花下

老子年來頗自許心腸鐵石尚一點消磨未盡愛花成
癖懊惱每嫌寒勒住丁寧莫被晴烘拆奈暄風烈日太

無情如何得 張畫燭頻頻惜憑素手輕輕摘更幾番
雨過彩雲無跡今夕不來花下飲明朝空向枝頭覓對
殘紅滿院杜鵑啼添愁寂

又 范尉梅谷

赤日黃埃夢不到清溪翠麓空健美君家別墅幾株幽
獨骨冷肌清偏要月天寒日暮尤宜竹想主人杖屨繞
千回山南北 寧委澗嫌金屋寧映水羞銀燭歎出羣
風韻背時粧束競愛東鄰姬傳粉誰憐空谷人如玉笑

林逋何遜漫為詩無人讀

又

金甲琱戈記當日
轅門初立磨盾鼻
一揮千紙龍蛇猶
濕鐵馬曉嘶營壁
冷樓船夜渡風濤
急有誰憐猿臂故
將軍無功級
平戎策從軍什
零落盡慵收拾
把茶經
香傳時時溫習
生怕客談榆塞事
且教兒誦花間集
歎
臣之壯也不如人
今何及

卜算子

手植海棠盛開風雨作崇輒作小詞二首

盡是手成持合得天饒借風雨於花有底讐著意相陵
藉做暖逼教開做冷催教謝不負明年花下人只負
栽花者

又

片片蝶衣輕點點猩紅小道是天公不惜花百種千般
巧朝見樹頭繁莫見枝頭少道是天公果惜花雨洗
風吹了

昭君怨

牡丹

曾記洛陽舊譜只許姚黃獨步若比廣陵花太虧他
舊日王侯園圃今日荆榛狐兔君莫說中州怕花愁

又瓊花

后土宮中標韻天上人間一本道號玉真妃字瓊姬
我與花曾半面流落天涯重見莫把玉簫吹怕驚飛

清平樂

丹陽舟中作別意

休彈別鶴淚與絃俱落歡事中年如水薄懷抱那堪作
惡 昨宵月露高樓今朝煙雨孤舟除是無身方了有

身長是閒愁

又 五月十五夜詠月

纖雲掃跡萬頃玻瓈色醉跨玉龍游八極歷歷天青海
碧 水晶宮殿飄香羣仙方按霓裳消得幾多風露變
教人世清涼

又

風高浪快萬里騎鯨背曾識嫦娥真體態素面元無粉
黛 身游銀闕珠宮俯看積氣濛濛醉裏偶搖桂樹人

間喚作涼風

又

項在維揚陳師文參議家舞姬絕妙賦此

宮腰束素只怕能輕舉
好簪避風臺護取莫遣驚鴻飛
去一團香玉溫柔笑顰俱有風流貪與蕭郎眉語不
知舞錯伊州

玉樓春

戲呈林節推鄉兄并下一首

年年躍馬長安市
客裏似家家似寄
青錢換酒日無何
紅燭呼盧宵不寐
易挑錦婦機中字
難得玉人心下

事男兒西北有神州莫滴水西橋畔淚

菩薩蠻

小鬟解事高燒燭羣花圍繞擣菰局道是五陵兒風騷
滿肚皮玉鞭鞭玉馬戲走章臺下笑殺灞橋翁騎驢
風雪中

憶秦娥

感舊

春醒薄夢中毬馬豪如昨豪如昨月明橫笛曉寒吹角
古來成敗難描摸而今却悔當時錯當時錯鐵衣猶

在不堪重著

又

梅謝了塞垣凍解鴻歸早鴻歸早憑伊問訊大梁遺老
浙河西面邊聲悄淮河南北炊煙少炊煙少宣和宮
殿冷煙衰草

又

遊人絕綠陰滿野芳菲歇芳菲歇養蠶天氣采茶時節
枝頭杜宇啼成血陌頭楊柳吹成雪吹成雪淡烟微

雨江南三月

長相思

寒相催煖相催催了開時催謝時丁寧花放遲
角聲吹笛聲吹了南枝吹北枝明朝成雪飛

又

風蕭蕭雨蕭蕭相送津亭折柳條春愁不自聊
煙迢迢水迢迢準擬江邊駐畫橈舟人頻報潮

浪淘沙

旅況

紙帳素屏遮全似僧家無端霜月闌窗紗喚起玉關征
戍夢幾疊寒笳 歲晚客天涯短髮蒼華今年衰似去
年些詩酒新來俱倚闌孤負梅花

一剪梅

中秋解宜春邸印

陌上行行惟府公還是文窮還是詩窮下車上馬太匆
匆來是春風去是秋風 階銜免得管兵農嬉到昏鐘
睡到齋鐘不須提岳與知宮喚作溪翁喚作山翁

踏莎行

甲午重九牛山作

日月跳丸光陰脫兔登臨不用深懷古向來吹帽插花
人盡隨殘照西風去老矣征衫飄然客路炊煙三兩
人家住欲携斗酒答秋光山深無覓黃花處

劉伯寵

名褒武夷人一字春卿

水龍吟

桂林元夕呈帥座

東風起穀池波輕陰未放游絲墮新春歌管豐年笑語
六街燈火繡轂雕鞍飛塵卷霧水流雲過恍揚州十里

三生夢覺捲朱箔映青瑣
金猊戲掣星橋鎖博山香
烟濃百和使君行樂絳紗萬炬雪梅千朵羯鼓喧空鷗
絃沸曉櫻梢微破想明年更好傳柑宴罷醉扶狨座

雨中花慢

春日旅况

縹蒂細枝玉葉翡英百梢爭趁春忙正雨後蜂粘落絮
燕撲晴香遺策誰家蕩子唾花何處新粧想流紅有恨
拾翠無心往事淒涼
春愁如海客思翻空帶圍只看
東陽更那堪玉笙度曲翠羽傳觴紅淚不勝閨怨白雲

應老他鄉夢回羈枕風驚庭樹月在西廂

滿庭芳

留別

柳裊金絲梨鋪香雪一年春事方中燭前一見花艷覺
羞紅枕臂香痕未落舟橫岸作計匆匆明朝去暮天平
水雙槳碧雲東 隔離歌一闋琵琶聲斷燕子樓空歎
陽臺夢香行雨無蹤後會芙蓉未老從今去日望歸鴻
愁如織斷腸啼鴂饒舌訴東風

六州歌頭


上廣西張帥

憑深負阻蝨午肆奔騰龍江上妖氛漲鯨海外白波驚
羽檄交飛急玉帳靜金韜閔恢遠馭振長纓密分兵細
草黃沙渺渺西關路風裊高旌聽飛霜令肅堅壁夜無
聲鼓角何神地中鳴看追風騎攢雲掣雷野轂激天
鉦飛箭集旄頭墜長圍掩郭東傾振旅觀旋凱笳鼓競
繡旗明刀換犢戈藏草士休營黃色赤雲交映論功何
止蔡州平想環城蒼玉深刻入青冥永詔來今

水調歌頭

中秋

天淡四垂幕雲細不成衣西風掃盡纖翳掠我鬢邊絲
破匣菱花飛動跨海清光無際草露滴明璣杯到莫停
手何用問來期坐虛堂指病眼汴流輝雲山應有幽
恨瑤瑟掩金徽河漢無聲自轉玉兔有情亦老世事巧
相違一寫謫仙怨雙淚滿君頤



花菴詞選續集卷七